

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(XXIV)8

**SOALAN BERTULIS OLEH AHLI KAWASAN TELOK AYER TAWAR
YB. MUSTAFA KAMAL BIN AHMAD**

8. Nyatakan secara statistik kedudukan pelaburan asing di Negeri Pulau Pinang dari tahun 2013 hingga kini dan sejauh mana sumbangan pelaburan asing ke atas Kerajaan Negeri.

**YB. DATO' IR. HAJI AHMAD ZAKIYUDDIN BIN ABD. RAHMAN
MENJAWAB BAGI PIHAK Y.A.B. KETUA MENTERI**

8. Statistik pelaburan asing (FDI) berbanding jumlah keseluruhan pelaburan di Pulau Pinang dari tahun 2013 hingga 2017 adalah seperti jadual berikut :

Tahun	Jumlah Pelaburan (RM juta)	Jumlah FDI (RM juta)	Sumbangan FDI kepada jumlah pelaburan (%)
2017	10,811.88	8,540.49	79
2016	4,293.89	3,056.92	71
2015	6,724.34	4,498.73	67
2014	8,162.37	5,113.59	63
2013	3,912.25	1,794.39	46

FDI khususnya dalam sektor pembuatan terus kekal sebagai komponen penting dengan menyumbangkan di antara 46%-79% kepada jumlah pelaburan di Negeri Pulau Pinang dari 2013-2017.

Selain menyumbang kepada angka jumlah keseluruhan pelaburan di Pulau Pinang dan menjadi pemangkin kepada pertumbuhan sektor

perindustrian, kemasukan pelaburan asing juga menyumbang kepada pertumbuhan sektor industri baharu seperti dalam bidang sains kesihatan melalui pembuatan peralatan perubatan (*medical devices*) yang mula mendapat permintaan tinggi di pasaran global. Manakala sektor teknologi yang boleh diperbaharui seperti tenaga solar, perkhidmatan perkilangan elektronik (EMS), semikonduktor, automotif, aeroangkasa, avionik dan teknologi LED juga merupakan sektor baharu yang sedang giat diteroka oleh pelabur asing.

Perkembangan sektor industri baharu seperti ini juga menawarkan peluang dan bidang pekerjaan yang lebih meluas. Syarikat-syarikat yang terlibat dalam industri yang khusus ini mula beroperasi di sekitar kawasan Bayan Lepas dan Batu Kawan. Ini boleh menarik dan mengekalkan bakat serta kemahiran bekerja di Pulau Pinang dan meningkatkan minat belia dalam STEM (Science, Technology, Engineering, Mathematics) termasuk sektor vokasional.

Kewujudan pelabur asing juga menyumbang kepada pertumbuhan dalam sektor perkhidmatan seperti *Global Business Services* (GBS) iaitu perkhidmatan profesional dalam bidang kewangan, sumber manusia, reka bentuk kejuruteraan, reka bentuk dan pembangunan perisian (ICT *design & development*), teknologi maklumat dan industri pengetahuan. Hab “GBS” sedang berkembang dengan pesat di Pulau Pinang terutama di kawasan pusat bandar Bayan Lepas.

Pulau Pinang yang menjadi pilihan pelaburan asing di rantau ini telah meningkatkan kerjasama dan sinergi dengan agensi-agensi Kerajaan Negeri dan Persekutuan untuk terus mempromosi Pulau Pinang sebagai “*Silicon Island of the East*”. Ini termasuk perkongsian sumber-sumber dan mengelakkan *redundancy* dan pembaziran. Contohnya, misi promosi pelaburan yang diselaraskan, perkongsian perisikan pasaran dan sebagainya.

Apabila Pulau Pinang menjadi destinasi pelabur asing maka bilangan pelancong santai mahupun atas urusan perniagaan atau rawatan kesihatan turut meningkat. Ini membuatkan syarikat-syarikat penerbangan dan agensi-agensi berkaitan untuk menambah bilangan penerbangan terus antarabangsa (terbaharu seperti penerbangan terus ke Shanghai dan Doha, Qatar). Disamping itu, Pulau Pinang turut mendapat peruntukan untuk memperluas dan menaik taraf Lapangan

Terbang Antarabangsa Pulau Pinang bagi memenuhi keperluan pelabur baru dan pelabur sedia ada dari aspek peningkatan kapasiti penumpang dan kargo antarabangsa.

Kesimpulannya, kemasukan pelabur asing sama ada dalam sektor perindustrian mahupun sektor perkhidmatan memberi sumbangan yang besar kepada pertumbuhan pesat sosio-ekonomi Pulau Pinang di mana proses perbandaran berlaku dengan pesat, menggalakkan kewujudan pelbagai industri hiliran tempatan serta menawarkan peluang pekerjaan tenaga mahir dan separuh mahir kepada penduduk tempatan.